

四庫全書

集部

欽定四庫全書

集部

御訂全金詩增補中州集卷三八

詳校官中書_臣張虎拜

主事銜_臣徐以坤覆勘

總校官編修_臣王燕緒

校對官編修_臣勵守謙

謄錄監生_臣黃嘉績

欽定四庫全書

御訂全金詩增補中州集卷三十八

呂陳州子羽

四首

子羽字唐卿大興人大定末進士仕至陳州防
禦使元光末為酷吏所誣以乏軍興繫獄比赦
至唐卿自縊死朝臣有辨其冤者詔復官希顏
為制辭云毀譽之來在仁賢而不免是非之論
至久遠而乃公人謂唐卿於此語為無媿屏山

故人外傳呂氏自國朝以來父子昆弟凡中第者六人以六桂名其堂貞幹字周卿尤自刻苦酷嗜文書著碣石志數十萬言皆近代以來事迹幽隱譎怪詼諧嘲評無所不有在史館論正統獨異衆人謂國家止當承遼大忤章廟旨謫西京運幕量移北京致仕自號虎谷道人晚年感末疾又號呂跛子自作傳以見志閒閒公亦以為篤志君子也弟士安字晉卿卿雲字祥卿

子鑑字德昭皆名士

補歸潛志呂陳州子羽字唐卿大興人少為名
進士擢第南渡為左司郎中坐事免官後同知
開封府遷陳州防禦使時軍旅數興戶口逃竄
公因以實聞於朝而小人李煥以為不憂國失
軍儲下吏當死公耻之縊於太康驛後朝廷知
其無罪復其官公入仕以能稱讀書為文有士
大夫風致死非其罪天下傷之

廣平道中

風色著鰲面霜華侵老鬚昏埃埋故驛積雪縞修途凍
岫新詩句寒林古畫圖夜寒孤月上天地一冰壺

宿章義廣勝寺

小邑本無事我來勞簡書路長頻問馬人靜厭烹魚鐘
冷僧叅外燈殘客夢餘此心誰領會松月夜窓虛

至日

歲晏多風雪官閒深屋廬小詩窮則變美酒數斯疏未

草歸田賦空翻引睡書窓明添眼力已覺日光舒

李白醉歸圖

春風醉袖玉山頽落魄長安酒肆迴忙煞中官尋不得
沉香亭北牡丹開

趙鹽部文昌

一首

文昌字公權平陽人明昌二年進士仕至遼東
路鹽使博學好持論周常山甚愛之子觀字維
道從事史院資謹厚不忤於物閒閒許其字畫

進進不已可到古人云

軍中寄親舊

軍中從事鬢絲垂把釣江湖與願違紅葉關河為客久
黃花時節寄書稀霜天不盡孤雲遠秋意無聊一鴈飛
鄉社故人應念我豈知南望更依依

韓內翰玉

二首

玉字溫甫其先相人五世祖繼寧仕石晉為行
軍司馬從出帝北遷居析津曾孫知白仕遼為

中書令孚為中書門下平章事賜田盤山遂為
漁陽人曾祖錫字難老仕國朝以濟南尹致仕
溫甫明昌五年經義詞賦兩科進士入翰林為
應奉應制一日百篇文不加點又作元勲傳稱
旨道陵歎曰勲臣何幸得此家作傳耶泰和中
建言開通州路水漕渠船運至都陞兩階授同
知陝州東路轉運使事大安三年都城受圍夏
人連陷邠涇陝西安撫司檄溫甫以鳳翔總管

判官為都統府募軍旬月得萬人籍秦州場買馬官香及鳳翔冒買馬七百寶雞埋沒官鐵他州郡弓弩數千以給軍出屯華亭與夏人戰敗之獲牛馬千餘時夏兵五萬方圍平涼又戰於北原夏人疑大軍至是夜解去當路者忌其功驛奏溫甫與夏寇有謀朝廷疑之使使者授溫甫河平軍節度副使且覘其軍先是華州李公直以都城隔絕謀舉兵入援而溫甫恃其軍為

可用亦欲為勤王之舉乃傳檄州郡云事推其
本禍有所基始自賊臣貪容姦賂繼緣二帥貪
錮威權既止夏臺之師旋致會河之敗又云齊
魏以高壘為能堅蒲絳以穿空為得計裹糧坐
費盡膏血於生民棄甲復來竭資儲於國計要
權力而望形勢連歲月而守妻孥又云命令不
至京師奈何盼盼四集之師懸懸半歲之上人
誰無死有臣子之當然事至於今忍君親之弗

顧勿謂百年身後虛名一聽史臣只如今日目
前何顏以居人世公直一軍行有日矣將佐違
約國朝人有不從者輒以軍法從事京兆統軍
便謂公直據華州反遣都統楊珪襲取之皆置
極刑公直曾為書約溫甫溫甫不預知其書乃
為安撫所得公直書三一與京兆宣撫一與溫甫一與楊珪故京兆軍得因書襲
華州及使者覘溫甫軍且疑預公直之謀即實其
罪溫甫赴官道出華州被囚死於郡學臨終書

二詩壁間士論寃之溫甫先賦怪松云昂藏殊
未展偃僂旋自縮惜爾雲外姿耐此胯下辱又
云木高衆必摧地厚敢不跼河中皆汎汎澗底
自鬱鬱未幾被禍人以為讖云子不疑字居之
小字錦郎以父死非罪誓不祿仕丙申之夏過
予冠氏出其父臨命時手書云此去冥路吾心
皎然剛直之氣必不下沈兒可無慮世亂時艱
努力自護幽明雖異寧不見爾予為之惻然

補歸潛志韓府判王字溫甫燕人少讀書尚氣
節擢第入翰林為應奉文字後為鳳翔府判官
大安中北兵圍燕都夏人連陷邊城陝西帥府
檄溫甫為都統募軍得萬人出屯華亭與夏人
戰敗之而溫甫毅然有勤王志因移檄關中言
詞忠壯聞者感動其檄中有云人誰無死有臣
子之當然事至於今忍君親之弗顧勿謂百
年身後虛名一聽史臣只如今日目前何顏以

居人世王侯將相寧有種乎富貴功名當自致
耳或誣溫甫以有異志收鞫死獄中士大夫憤

惜

臨終二詩

客自朝那戍東過古鄭原衰年會凶運奇禍發流言白
骨將為土青蠅且在樊仰呼天外恨沈思地中冤母喪
半途鬼兒孤千里魂此心終不滅有路訴天閭

天下無雙士軍中有一韓才名兩相累世道一何難旅

次窮冬暮囚孤永夜寒身亡家亦破巢覆卵寧完矍鑠
鞍仍在驚呼缺屢彈丈夫忠義耳何必涕洟瀾

王都運擴

一首

擴字充之永平人明昌五年進士累遷同知德
州防禦使事山東饑詔馳驛赴官且以賑貸事
付之時棣州饑尤甚而不在發粟之數充之擅
開倉救之朝廷不之罪也泰和七年夏旱充之
以監察御史受詔審冤因為同列言往時審冤

一切以末減為事至殺人者之罪亦貫出之地
下之冤當誰理之乎使還言初設三司不便大
畧言三司之設特以刻剝為事大定間一曹望
之為戶部天下倉廩府庫皆實百姓無愁怨之
聲存乎其人不在改官稱也今三司官皆戶部
舊員掾屬亦戶曹舊吏豈有愚於戶部而智於
三司者乞復戶部之舊無駭民聽可也崇慶初
遷河東北路按察僉事上書言時病四一將不

知兵二兵不可用三事不素定四用人違其長
貞祐二年太原受兵充之之功為多最後權陝
西西路轉運使行六部尚書前政太原喬世權
子實燕人趙伯成子文號為稱職充之表表自
見雖處細務亦有法掾屬奔走從事無敢後者
評者謂子實寬緩欲為不忍欺子文慎密欲為
不能欺皆未必能然獨王公之不敢欺為有微
云年六十三致仕卒子元慶字善甫歸德行六

部郎中次子元亨

題神霄宮清心軒

紛紛百慮自心生方寸清來百慮平
未了此心私自笑更憂時世欲澄清

趙吏部伯成 三首

伯成字子文宛平人明昌五年經義詞賦兩科
進士博通書傳有真積之力性沈厚言必中理
從在太學日人以趙骨鯁目之累遷侍御史拜

中丞陝西西路轉運使靜難軍節度使哀宗即位召為吏部尚書生為飛語所中罷官卒於崧山中潞人宋文之說其臨終甚明了也

蠟梅二首

凍蕾含香蠟點勻古來幽谷有佳人詩家只怨和羹晚不道紅梅別是春

冷艷疎香寂寞濱欲持何物向時人東風自是清狂手辦作竹籬茅舍春

元弟以所業見投賦詩為贈

耆舊隔存歿為君重歎嗟人門得嵇紹文賦見張華風
有凌雲筆方乘犯斗槎忘年即吾友未可論通家

梁錄事仲新

一首

仲新字良輔朝城人明昌五年進士初試仙掌
承露詩主司以為擅場用是知名卒於許州錄
事

江天暮雪圖

南雪不到地霏霏滿竹樓沙河燈市裏春在木綿裘

盧待制元

一首

元字子達玉田人父啓臣字雲叔第進士仕宦
不達自號浹水先生和趙元發劉師魯葛藤韻
云乳兔生長角鑿湯結厚冰木終成假佛髮不
礙真僧莫認指為月須明火是燈拈花微笑處
會意更誰能子達幼而敏惠年未二十試於長
安為策論魁擢第後又中策魁明昌初章廟設

宏詞科命公卿舉所知子達與郭黻周詢張復
亨就試凡七日並中選遂入翰苑累遷至待制
二兄長庸弟曾名進士又俱擢高第時人以燕
山竇氏比之屏山故外傳云爾子安字希謝
翔字仲升仲升正大末登科

閒詠

天近蒼龍闕居連白馬堂松聲得鄰舍山色出宮牆
巷陋輪蹄少庭閒日月長九衢紅霧裏亦有白雲鄉

太常卿舒穆魯世勣

一首

世勣字晉卿承安中進士終於禮部尚書子嵩
字企隆應奉翰林文字父子皆死蔡州之難

補歸潛志舒穆魯翰林世勣字晉卿契丹人少有
詞賦聲擢第讀書為文有體致南渡為左司郎
中坐事免久之為禮部侍郎司農太常卿翰林
侍講學士從末帝東征至蔡州城陷死有子嵩
企隆

紙鳶

鴟鵂鴞誰雌雄假手成形本自同
果物戲人人戲物為風乘我我乘風
扶搖漫擬層霄上高下都歸半紙中
兒輩呶呶方佇目豈知天外有冥鴻

范滑州中一首

中字極之大興人承安中進士累官京西路司
農少卿滑州刺史好賢樂善有前輩風流貞祐
中高琪當國專以威刑肅物士大夫被捃撫者

答辱與徒隸等醫家以酒下地龍散投以蠟丸
則受杖者失痛覺此方大行於時極之有戲云
嚼蠟誰知味最長一杯卯酒地龍香年來紙價
長安貴不重新詩重藥方時人傳以為笑極之
嗜讀書一以資於詩詩亦往往可傳壬辰卒於
京師年五十七

贈韶山退堂聰和尚

郎當舞袖少年場線索機關似郭郎今日棚前閒袖手

却教鼓笛看人忙

趙禮部思文

六首

思文字廷玉永平人明昌五年進士貞祐中陷
沒都城間闕南渡遂為朝廷所知歷虢州刺史
汝州防禦使金安集慶兩軍節度使召拜禮部
尚書壬辰卒官為人誠實樂易自少日有君子
長者之目南狩以後趙吏部子文楊禮部之美
趙禮部周臣陳司諫正叔與廷玉皆完人終始

無玷缺者也第廷珪同榜登科三子敬叔介叔方叔今居鄉里

補歸潛志趙尚書思文字廷玉中山人與其弟廷秀廷直皆進士公少擢第為省掾從完顏福興守燕都福興死奔詣南京行宮擢侍御史出為汝州防禦使遷集慶軍節度所在鎮靜吏民賴之公暇以詩酒為樂好吹笛多著樂章為人傳誦南渡後士大夫有典郡之榮者不及也正

大末召為禮部尚書卒為侍御時與余先子同
臺為禮部時余始一識也為人寬厚有君子之

風

試院中呈同官崔伯善李順之

睡起松陰鳥雀譁忽驚霜果墮檐牙簡書迫促全疎酒
眼力眇昏只費茶不學道人食柏葉却隨舉子踏槐花
提衡文字非吾事崔李風流有故家

侯相浪溪歲寒堂

靜中臺榭隔紅塵
水色山光日日新
不用沿溪種松竹
主人元是歲寒人

捕蝗感草蟲有作二首

雖是形模不苦爭
汝能傷稼我能鳴
誰知竟有長平禍
玉石填來共一坑

草蟲悲咽不能言
亂逐螟蝗瘞古原
水底癡龍正貪睡

甕中蝎虎更銜冤

二詩疑圓城中作
觀者可以意推之

嵩山承天谷又云逍遙谷

煙霞直上逍遙谷路轉山腰咫尺迷已覺洞天分聖境
更疑石磴是仙梯霜添紅葉黃花好天與金壺玉柱齊
兩峯名醉倚西風正南望暮雲烟草一時低

弔同年楊禮部之美

海內文章選人中道德師爭教衰病足不到鳳皇池

李坊州芳 一首

芳字執剛大興人承安二年進士歷乾坊兩州
刺史同知都轉運使事為人敬賢下士款曲周

至聞人一善極口稱道士論以此歸之又精於
吏事累以廉能進秩正大末致仕歿於洛陽之
難

留別

祿食媿踰量智困念歸愚符竹恒為累幸及引年初驅
馬國西門初服返田廬金閨富才彥絕足駛高衢眷我
謝朝跡冠蓋寵歸途豈不榮顧瞻亦踟躕煌煌丹
山鳳覽德萃清都行人得棲止老鶴青天孤石樓俯清

伊旁有幽人居儻逢經過便山水足相娛

御訂全金詩增補中州集卷三十八

欽定四庫全書

御訂全金詩增補中州集卷三十九

劉鄩縣昂

三首

昂字次霄濟南人承安五年進士調鄩縣令劉
光甫曾為同官稱次霄高材博學詩時有佳句
云

補歸潛志劉昂次霄濟南人有才譽以先曾有
劉之昂故號小劉之昂泰和南征作樂章一闋

上平西為時所傳其詞云蠶鉉舉蟾臂展敢盟寒
視洞庭彭蠡狂瀾天兵小試萬蹄一飲楚江乾
捷書飛上九重天春滿長安舜明文唐日月周
禮樂漢衣冠洗五川煙瘴江山全蜀下也劒關
何用一泥丸有人傳信日邊來都護先還終鄒
平令

零口早行

馬上兀殘夢沈沈天向晨行雲如妬月古道不逢人野

曠耕聲遠山高露氣新
哦詩無好語聊爾一吟呻

讀三國志二首

虎視鯨吞卒未休
一時人物盡風流
婦翁正得黃承彥
兒子當如孫仲謀
乳臭嗣君真寄坐
齒寒鄰國莫分憂
阿瞞狐媚無多罪
誰作桓文得到頭

泣漢遺黎血未乾
繁昌新築受終壇
天球寶鼎私臧獲
坎井坳堂局鳳鸞
地易主賓窮赤壁
勢成螳雀事烏丸
陳言哀哀令人厭
枉就輸棋覆舊盤

錦峰王仲元

三首

仲元字清卿平陰人承安中進士以能書名天下歷京兆轉運司幕官子公茂今在雲中

補歸潛志王府判仲元字清卿東平人廣道先生之姪也工書法趙黃山自號錦峰老人卒於京兆幕

附楊奐錦峰王先生墓表先生姓王氏諱仲元字清卿家平陰廣道先生之猶子明道先生之

子世以儒道著一時名公鉅人若党懷英趙鳳
皆師尊之先生舉進士有聲承安五年四舉推
恩賓高雅清苦寡言笑無雜賓嘗知阿干縣憲
司以簡靜聞退食擁琴書不出正襟危坐似與
世相忘也遇會心者雖對談竟日未聞涉貴游
可喜事人信其為古君子也而書名尤重小楷
介歐虞間用薦者召應奉翰林文字同進士入
玉堂自先生始改陝西東路轉運司鹽鐵判官

適書藍田山碑飲玉漿偶得疾卒於官舍貞祐
四年也卒之日家無餘貲藁葬城南鴈塔之陰
隣永平王尚書擴墓經兵寺宇廢盪荆棘埋沒
迷所在後三十八年尚書子元卿至審其墓西
十五步初元卿許並負而東既而恐親族零落
無可歸甲寅五月九日奉天楊奐感念平素會
長安邛邦用楊天德來獻臣同德張琚高唐趙
安世柝津張儆燕南毛居仁耿都陳爰雲中孟

攀鱗太華郭時中鄠郊范文炳平陸負擇加以
衣衾藏之故穴蓋有待也

雪中同周臣內翰賦

天上瑞花散不收溫溫叶氣浹皇州橫溪月澹梅宜臘
平野風閒麥有秋清興雅高東武會孤吟誰似灞陵游
西山玉立三千丈好句都輸趙倚樓

雪

初稀時拂拂稍密自紛紛老樹曉迷月瘦峯寒帖雲色

從空際得聲向靜中聞客枕清無夢哦詩徹夜分

贈青柯坪隱者

太華神明觀青柯小有天大哉霄壤內無此第昆賢
齊物三千行棲雲二百年初平初起後又得兩臞仙

盧宜陽洵一首

洵字仁甫高平人李承旨致美見所作上梁文
勉使就舉六十一歲呂造榜登科歷河南府教
授河陽丞宜陽令致仕後居伊陽年八十三卒

仁甫有詩學以鞏原及赤壁圖詩著名招飲云
南園仙杏猩紅破北渚官醪玉液醇已約尊前
成二老全勝月下作三人

白溝

白沙清淺不容舟遼宋封疆限此溝到了山河無定主
碧波依舊只東流

刁涇州白

三首

白字晉卿信都人呂造榜乙科歷涇州幕官入

補省掾卒作詩極致力樂府尤有風調今散失
不復見矣

渭水

渭水秋天白驪山晚照紅行人迷古道老馬識新豐霜
雪滿歸鬢乾坤猶轉蓬愁來成獨酌醉袖障西風

物質

物質方圓定營營止自疲鶴鳬傷斷續鵬鷃失高卑巧
宦多成拙徐行未必遲可憐箏上鴈來往聽人移

送花

縱橫詩酒少年曾老矣追懽謝不能
種出好花無用處
東鄰乞與坐禪僧

劉戶部光謙

一首

光謙字達卿潘州人父澤字潤之為部掾斷獄
有陰德劉之昂與之酬唱其詩有云侯門舊說
炎如火陋巷今猶冷似冰半夜杯盤長袖舞白
頭書冊短檠燈用是人不敢以府史待之達卿

泰和三年進士資幹局處事詳雅為朝廷所知
累官司農少卿病瘡許州宣宗勅國醫診視之
卒年五十六好問為舉子時識於登封相得甚
歡罇酒談笑有味使人不能忘也

寄陳正叔雷希顏

東南形勝古徐州人物休評第幾流
落落陳雷天下士故應連榻臥黃樓

毛提舉端卿一首

端卿字飛卿彭城人父矩桓州軍事判官歿王
事飛卿二十歲始知讀書游學齊魯間備極艱
苦饑凍疾病不以廢業凡十年以經義魁東平
泰和三年擢第累遷提舉權貨司戶部員外郎
性剛明疾惡過甚坐與監察御史相可否為所
中傷降鄭州司候改孟津丞將復用矣會卒子
思適今居東平

題崞縣郝子玉此君軒

桂林名姓一枝新萬竹青青德有鄰渭上風烟分別派
山陽詩酒屬閒人心期已到冰霜窟眼界不知花柳塵
萱背從今看輝映嫩香新粉四時春

康司農錫

一首

錫字伯祿寧晉人其祖嘗與兄弟分財他田宅
無所問止取南中生口十餘人縱為民而已以
故家獨貧父奕為里胥性純篤縣令嘗倚之以
納賄及令為御史所劾奕自念言直則令被罪

終世不齒渠官長而我以事證之何以立於世
乃自縊而死令竟以無迹可尋獲免伯祿既養
於外祖田氏田氏見伯祿骨骼異他兒謂當有
望使之應童子舉飲食臥起躬自調護備極勞
苦得解赴都一日日暮行茭葦中懼為同行所
遺至背負伯祿而行及長師柏鄉王翰周輔束
脩不能備周輔與諸公共賙給之黃裳榜擢第
歷櫟陽簿警巡判官辟彭原令補省掾考滿遷

開封府判官拜監察御史言宰相侯摯師安石
非相材提點近侍局宗室安之聲勢焯焯請託
公行不可使久在禁近朝議偉之選授右司都
事京南路司農丞破上蔡諸縣羣不逞把持之
嘗以河中治中充行六部郎中從軍城陷投水
死伯祿孝於母友於其弟有恩義於朋友從政
則死心以奉公為民古所謂公家之利知無不
為者惟伯祿為然同年生如雷希顏冀京父宋

飛卿之等名士數十人世以比唐日龍虎榜至
論氣質尚以伯祿為稱首云

補歸潛志康司農錫字伯祿趙州人與雷希顏
冀京父同年進士正大初由省掾拜監察御史
上章言點檢完顏薩哈勒與赫舍哩約赫德大
恣橫不法時二人權勢赫然伯祿皆不屑士論
稱焉後為河南路司農少卿再授河中帥府經
歷官北兵陷河中率帥兵南奔濟河船敗死為

人重厚有為頗讀書嘗賦打毬詩云高飛遠走
偶然爾坎止流行恣所之余先子云亦有理也
按部南陽有贈

魯山佳政霑鄰邑白水歡謠見路人縣務清談君自了
農郊夙駕我何勤星河直上冰輪轉桃李前頭玉樹春
海宇疲民望他日草堂那得遽移文

張戶部德直

一首

德直字伯直平陽人叔祖邦彥字彥才張揖榜

登科以當川令致仕有松堂集行於世嘗有詩
云青山淡淡水溶溶盡出蒼祇點化工無限燒
痕渾綠染可憐高木待春風父廸祿字仲英明
昌初進士歷岐山上黨二縣令卒於省掾伯直
貞祐三年進士釋褐新平簿辟藍田令秩滿父
老詣行臺留再任去之日為立生祠移沔池通
許召補省掾選授右警巡使終於同知武勝軍
節度使事子城今居永寧

叔能見過

度嶺千峰濶沿溪一徑微
山寒花發晚村迴客來稀
強飲酬佳節悲歌送夕暉
平生愛歡聚衰病與心違

馮辰一首

辰字駕之臨潼人貞祐三年進士辟涇陽令九

歲知作詩

雨後

時年十三

東風花外錦鳩啼喚起西山雨
一犁綠滿蔬畦人不到

桔槔閒立夕陽低

王世昌

二首

世昌字慶長寧州人貞祐三年同進士出身以
信都丞致仕

過華州

拔地三峰冷翠微
落崖飛瀑噴珠璣
吟鞭落托騎驢過
戰刃韜藏牧馬歸
十丈玉蓮秋不謝
半楞掌月晝還飛
地靈人傑無遺逸
未分蟠螭老布衣

方城東寺海棠

苦苣如針草有芒桃花輕薄絮顛狂
少陵例有詩沾丐只枉無言到海棠

李宜陽過庭一首

過庭字庭訓武亭人貞祐二年進士歷宜陽永
寧滎陽三縣令所去見思入為右曹掾斷獄寬
平當妖賊李亨首坐所註誤數百人皆從輕法
正大中擢右三部司正終於昌武軍節度副使

少日從太原王正之學故詩文皆有可觀人初
與交者皆不能合久之知其為淳質長厚人也
壬寅四月暴卒於東平子萼字華甫

讀公孫弘傳

古來好客數平津我道真龍未必真一箇仲舒容不得
不知開閣為何人

田錫 二首

錫字永錫宛平人興定五年進士調新蔡主簿

閒居南陽驥立山下資豪爽自少日有聲場屋
間作詩甚多弔蘇墳一篇有英靈還却眉山秀
依舊東風草木天之句世間傳之

補歸潛志田永錫義州人叔思敬耀卿名進士
永錫少有詩聲其過東坡墓云富貴一場春夜
夢文章萬斛冷雲泉英靈還却眉山秀依舊春
風草木天為人傳誦興定末同余試南京擢第
遭亂南奔在江淮間病卒

牧牛圖

干戈擾擾徧中州
挽粟車行似水流
何日承平如畫裏
短蓑長笛一川秋

故縣別業

九折驅車夢易驚
一廛老計喜初成
園蔬不借將軍地
宅券何勞宰相名
山入平簷供遠翠
水環釣石得深清
漫郎聲隻琦玕子
誰悟他生與此生

張介一首

介字介夫彭城人正大元年經義第一人歷鞏
穀熟二縣令幼有賦聲為人有蘊藉嘗贈詩人
楊叔能末章云我貧自救如沃焦君來過我亦
何聊為君欲寫貧士歎才思殊減荒村謠楊初
以荒村謠得名故云

讀天寶遺事

不但昨非今亦非上皇騎馬淚沾衣曲江死後無忠諫
却憶詞人秋鴈飛

龐漢

一首

漢字茂弘平晉人正大末年進士沈毅有志節
待次內鄉北山兵亂遇害

終南谿

冷雲低壓萬長楊十頃秋陰鎖北堂門外兵塵漲秦楚
水邊烟景似湖湘荷翻山雨僧窓晚竹汎溪風客枕涼
早晚初平遂真隱遶陂閒牧石頭羊

宋景蕭

二首

景蕭字望之濟川族孫正大六年進士辟令泰
安未赴遭亂望之於劉景玄為外兄故其詩頗
獲沾丐嘗有荒山銷盡古今魂之句詩家稱焉
河陽望河朔感遇一首

南來邊報日駸駸思禹亭高淚滿襟野燒為誰留白草
荒城空自隔疎林鴈聲不斷天連水山色無情古又今
離合興亡只如此往年爭識少陵心

春雪用上官明之韻

噍噍春蟲鬧撲窓地爐茶鼎蚓聲長詩中有味清於酒
只欠冰梢數點香

李警院天翼

三首

天翼字輔之固安人貞祐二年進士歷滎陽長
社開封三縣令所在有治聲遷右警巡使汴梁
既下僞寓聊城落簿失次無以為資辟濟南漕
司從事方鑿圓柄了不與世合衆口媒孽竟罹
非命輔之材具甚美且有志於學與人交欸曲

周密久而愈厚死之日天下識與不識皆為流涕予謂天道悠遠良不可知而天理之在人心者亦自不泯也

還家三首

幽花雜草滿城頭
華屋唯殘土一丘
鄉社舊人何處在
語音強半是陳州

牡丹樹下影堂前
幾醉春風穀雨天
二十六年渾一夢
堂空樹老我華顛

殊音異服不相親
獨倚荒城淚滿襟
祇有青山淡相對
似憐我是此鄉人

劉神童微

一首

微字伯祥益都人七歲能文道陵召入宮賦鳳
凰來儀二首稱旨賜經童出身係籍太學後登
貞祐二年第

春柳應制得城字

翠細圓勻綠線輕
著行排立弄新晴
更看三月春風裏

散作飛花滿鳳城

附金史選舉志明昌元年益都府神童子劉住
兒年十一歲能詩賦誦大小六經所書行草頗
有法孝行夙成乞依宋童子李淑賜出身且加
以恩詔上召至內殿試鳳凰來儀魚在藻詩又
令賦旱詩上嘉之賜本科出身給錢粟官舍令
肄業太學

附莊靖集王翼字輔之性穎悟勤於學七歲常

從師行有誦杜牧之華清宮詩後師舉似歷歷
能道之師頗奇焉八歲能屬文既長日記千言
應進士舉因感疾遂留意於醫尤精於易占無
不應於秀老德老二人處悟禪理太原公處精
術數誦古今才人詩得句法自著有古律詩三
百餘篇長短句二百首

附金蓮正宗記張神童馬丹陽詩云海上文章
第一儒重陽曾向醉中扶古今多少修真者應

此先生一箇無

郭宣道 一首

宣道字德明邢州人系出衣冠家人物楚楚而有老成之風貞祐中客南陽名士定興張履坦之罷鄧州觀察閒居此縣之石橋見德明愛之招致門下飲食教督委曲周備遂有聲場屋間正大末沒兵中

送同舍張耀卿補掾中臺

摩雲頭角看昂藏意外升沈豈易量取士皆知有科舉
進身初不在文章關心鴈塔功名晚試手烏臺歲月忙
此去一官先有路獨憐燈火夜窓涼

張仲宣

二首

仲宣字利夫相州人舉進士有聲子柔字子友
今在林慮

下第

主司頭腦舊冬烘更著書郎骨相窮曉賦得官何足道

直須遮馬困吳融

戲題石鹿蜂猴畫卷

橫槩將軍馬足塵判花學士筆頭春功名果屬丹青手
造物如何戲得人

胡汲一首

汲字直卿衛州人少有賦聲與新鄭傅伯祥呂
鵬舉相友善貌寢陋而滑稽無窮時命不偶竟
窮悴而死

失題

休笑參軍靴不襪莫嗟門客食無魚
燕鴻來去端誰使鵬鷃逍遙本自如
潦倒淵明三徑菊荒唐惠子五車書
古人淡裏求真味身外紛華不羨渠

王修齡一首

修齡字紹先同州人詩有得意好花開
早落喚愁芳草燒還生閒閒愛而戲之
目為癡仙人

黃葉行送祖唐臣歸柘縣

送君黃葉山黃葉紛不埽上有蕭蕭之風樹下有漫漫
之衰草山中黃葉行復青髀肉一消人自老酒盡意不
盡執手臨古道古道連延走錦襄錦襄日暮浮雲翔一
燈孤館相思處寒鴈一聲秋夜長



御訂全金詩增補中州集卷三十九

欽定四庫全書

集部

御訂全金詩增補中州集卷

四十至
四十二

詳校官中書臣張虎拜

主事銜臣徐以坤覆勘

總校官編修臣王燕緒

校對官編修臣勵守謙

謄錄監生臣黃嘉績

欽定四庫全書

御訂全金詩增補中州集卷四十

張參議澄

四首

澄字之純別字仲經本出遼東烏舍族國初遷
之隆安祖黃縣府君移官洛水因家焉之純早
孤能自樹立避地洛西率資無旬日計而泰然
以閉戶讀書為業嘗從辛敬之趙宜之講學故
詩文皆有律度兵後居東平詩名籍甚如云齊

客計窮思蹈海杞人癡絕漫憂天壞壁粘蝸艱
國步荒池漂蟻失軍容此類甚多

附元好問張仲經詩集序仲經出龍山貴族少
日隨宦濟南從名士劉少宣問學客居永寧永
寧有趙宜之辛敬之劉景玄其人皆天下之選
而仲經師友之故蚤以詩文見稱及予官西南
仲經偕杜仲梁麻信之高信卿康仲寧挈家就
予內鄉時劉內翰光甫方解鄧州倅日得相從

文字間伸經之所成就又非洛西時比矣北渡
後薄游東平謁見行臺嚴公一見即被賞識待
以師賓之禮授館於長清之別墅積十餘年得
致力文史以詩為專門之學此其出處之大畧
也今觀其詩在永寧賦幽居云寒盡陰崖草有
芽竹梢殘雪墮冰花號空老木風纔定倒影荒
山日又斜天地悠悠常作客干戈擾擾漫思家
烟村寂寞無人語獨倚寒藤數暮鴉其落筆不

凡類如此及來內鄉嘗阻雨板橋張主簿草堂
同賦浙江觀漲詩仲經云一雨天地來濤聲破
清曉光甫大加賞嘆以為有前人風調是年出
居縣西南白鹿原名所居為行齋取素貧賤行
乎貧賤之義行齋之南有菊水湍流噴薄景氣
古澹陽崖回抱綠莎盈尺臘月紅梅盛開諸公
藉草而坐嘉肴旨酒嘯咏彌日仲經有詩云寒
客遠峯猶帶雪煖私幽圃已多花仲梁雖有煖

散春泉百汨流之句亦自以為不及也其餘如
次韻見及云長松偃蹇千年物病鶴摧頽萬里
心春思云一春常作客連日苦多風野樹淒迷
綠簷花暗澹紅愁隨詩卷積囊與酒樽空巢燕
如相識頻來草舍中書事云故國三年夢新愁
兩鬢蓬淚從南望盡塗自北來窮破牖蠅烘日
枯梢鵲愛風悵然搔白首遠目過歸鴻贈負善
卿云詩材雖滿腹家具少於車珍珠泉感舊云

紅槿有情依壞砌綠莎隨意上寒廳秋興云壞
壁粘蝸艱國步荒池漂蟻失軍容秋日云寒花
矜晚色病葉怯秋聲憶永寧舊遊寄魏內翰云
上閣寺高迎晚翠游家樓小簇春紅獨脚云浴
岸瀟瀟雨送春老愛青山悟靜緣問路前村犬
吠人病枕偏宜夜雨聲林深鹿近人年衰與杖
宜雲出祗園雨亦香又如風琴一首回軍謠四
首清明日陪諸公讌集東園一首病中一首移

居學東坡八首再到方山絕句書陶詩後集句
往往傳在人口內相文獻楊公有言文章天地
中和之氣太過為荒唐不及為滅裂仲經所得
雍容和緩道所欲言者而止其亦得中和之氣
者歟為人資稟樂易恬於進取進退容止皆有
蘊藉可觀與人交重然諾敦分義終始可以保
任使之束帶立朝當言責之重豈得輕負所學
忘禮諫之義乎憂世既切惠養是其所長趙張

三王鈞距之吏奮髯抵几砉砉俊快保其羞而不為至於德讓君子之風良有望焉自丙午以後參幕府軍事當賢侯擁篲之敬得寸行寸謂當見之一日未一試而病不起矣其孤夢符持橘軒詩集求予編次感念平昔不覺出涕因題其後嗚呼有言可述學者之能事有子可傳人道之大本吾仲經言可述矣子可傳矣顧雖貴志下泉其亦可以少慰矣夫甲寅冬至日詩友

河東元某裕之題

積雨

積雨生頑痹新晴意自怡幽花依小徑野蔓媚疎籬
少從梳懶年衰與杖宜腐儒慙用拙糲食復何辭

和林秋日感懷寄張丈御史二首

塞草枯黃秋未殘北風裘褐日生寒田園正憶遂初賦
冰雪莫吟行路難囊穎露錐徒自苦蒯緱有劍祇空彈
南窓明暖無塵到慙愧高人老鵷冠

別家六見月牙新萬里風霜老病身塊坐瓊廬心悄悄
遠懷茅屋夢頻頻瓜田無取終成謗市虎相傳久是真
鄉國歸程應歲暮火爐煨栗話情親

輓馬圖

飛塹乘城力亦優不應伏檻便垂頭而今世上無良樂
兀兀黃塵輓得休

白賁一首

賁汴人自號決壽老自上世以來至其孫淵俱

以經學顯

客有求觀予孝經傳者感而賦詩

古人文瑩理後人但工文文工理愈暗紙札何紛紛君
看六藝學天葩吐奇芬詩書分體製禮樂造乾坤千岐
更萬轍要以一理存如何臻至理當從踐履論跋涉經
險阻錯研閱寒溫孝弟作先鋒道德嚴中軍仰觀及俯
察萬象入見聞不勞施斧鑿筆下生烟雲高以君唐虞
下以覺斯民君如不我鄙時來對爐熏

王內翰樞 一首

樞字子慎良鄉人遼日登科仕國朝直史館

三河道中

十載歸來對故山
山光依舊白雲閒
不須更讀元通偈
始信人間是夢間

睡軒趙晦 一首

晦字光道管城人宋末代州法曹秀容主簿汴
京破後不復仕自號睡軒居士子洵子都大定

二十年進士真定路總管判官孫綱三赴廷試
以蔭補官終於永壽令曾孫居禮之讓今在燕

中

暮春

壓枝梅子半青黃
葉底殘紅雨褪香
翠鈿舞風榆落莢
綠鍼浮水稻抽秧
酒濃猶覺春醒困
睡美方便午夢長
苦被啼鶯訴花老
揮毫聊作送春忙

浚水王世賞

四首

世賞字彥功汴人與尹無忌王逸賓趙文孺相
周旋明昌中保舉才能德行賜出身釋褐鞏州
教授終於鹿邑簿有浚水老人集傳於世

立春後十日登樓

今日登樓眼風烟倍覺新溪梅初破萼屋雪半融銀鴈
外天逾碧鷗邊水自春兒曹應見笑吟望獨傷神

春雪

只謂春天暖寧知雪霰飛龍蛇且深蟄花柳不勝威淦

淦凌風細紛紛帶雨稀誰當問穹昊生殺果何機

探梅

候得南枝破玉腮心顏今日為君開細看苔蘚無行跡
先賞應輸我獨來

稱善齋

宦途馳逐只堪羞何意須封萬戶侯平日少游真可念
絕勝辛苦駐壺頭

南湖靖天民

一首

天民字達卿淦陽人其父國初官原武因而家焉少日嘗兩魁鄉試自望者不碌碌所與交如龐才卿楊茂才劉之昂王逸賓皆一時名士晚年買田南湖葺亭圃植竹樹以詩酒為事自號南湖老人年七十九卒子文煒德昭從孫顯子昂

西子放棹圖

髻鬟蕭颯芡蘿秋千古香溪水自流吳越兵爭竟何得

風流輸與五湖舟

附遺山集南湖先生原武人年二十許時曾以
鄉試兩冠鄭州然其資侗儻所以自望者甚高
終不樂為舉子計即棄去學擊刺當正隆征南
頗欲馳逐戎行間既而大定詔書下兵各罷歸
先生抱利器而無所試乃浮湛里社以詩酒自
娛買田南湖之上築亭種樹徜徉乎其間盡置
家事日與賓客酣飲歌館棊檠窮日夕不少休

家故饒財又好施與其赴人之急猶疾痛之在
已故人尤以此歸之所與游如臨洺王逸賓游
宗之大定劉之昂其人皆天下名士至論人物
必曰靖達卿今日之奇男子也先生生於天會
初歷大定明昌泰和優游於太平和樂之世者
五十年大安兵興乃下世平生喜作詩樂府尤
有蘊藉觀西子放棹詩可見也嘗雪中騎青驃
行京水道中作長詩卒章有安得西都畫史吮

筆出新意寫作南湖老子雪景飛驟圖之句其
子文煒北渡後來東平始以先生之意追畫此
圖求僕賦詩文煒質直好義讀書作文有聲時
輩中觀其子可以想見先生之為人故為道其
事并以致懷賢之思云

東臯桑之維 一首

之維字之才恩州人蔡丞相伯堅之子壻也以
樂府著稱有東臯集傳於世

白髮

白髮近年見十中三兩莖半因愁僣出多為病添成梳
裏有時落鑷餘還又生老知無可避何處是功名

步元舉一首

元舉關中人

下第過榆次

栖遲零落未歸人已坐無成更坐貧意氣敢論題柱客
晨昏多負倚門親囊空漸覺錢餘貫衣敝翻饒蟲滿身

遙望秦關獨惆悵一天風雨落花春

馮文叔一首

文叔遼東人

客舍

禿襟短褐破書囊十五年來客異鄉
生事甯中搖虎尾窮途天上轉羊腸
三朝不遇馮唐老半夜悲歌甯戚狂
獨倚牛車望遼海西風塵土鬢蒼蒼

張庭玉一首

庭玉字子榮易縣人能日賦百篇有集行於世
即事

烏鵲繞樹山梨熟蝴蝶穿花木槿開赤脚城中借書去
蒼頭原上負薪來

宗道 一首

道字雲叟山陰人以足疾不仕有詩云家藏千
卷富身得一生閒茅屋經年補柴門盡日關其
自處可見

寶巖僧舍

寂寂鐘魚柏滿軒
午風輕颺煮茶烟
西堂竟日無人到
只許山人借榻眠

鮮于溥

三首

溥字彥仁宋文臣子駿之後高祖淳淳之子孝
標標之子壽吉壽吉之子坦皆擢進士第而仕
亦達彥仁坦之子以門資仕終於櫟陽令濟源
盤谷天壤佳處坦父子居其間飲酒賦詩翛然

塵垢之外至今人以高士目之弟彥魯子忠厚
今居鄉里

魯村道中

小橋沙路已堪圖更著衰翁跨蹇驢暮靄似催寒日短
秋容仍帶遠林疎雕盤平野黃榆落兔走橫岡白草枯
漸喜閒身遠朝市一年強半在村墟

春日倣舊詩體

年老逢春莫等閒逢春能得幾回看插花儘要花枝滿

把酒休辭酒殘乾好向酒邊留舞袖不妨花外駐吟鞍
聞身健在須行樂燕語鶯啼春又殘

早發

燈前夢斷家千里馬上詩成月一痕晨粥未烹官路遠
隔林烟火是漁村

史士舉

二首

士舉字仲升滎澤人漢功臣弘肇之後高祖所
賜鐵券故在其大父官濟源樂其山水因家焉

父神山令激石琚榜進士仲升以蔭補官歷銅
鞮三川兩縣令初任京兆錄事以歲旱擅開倉
賑貧身往太一湫禱雨尋獲嘉澍用是得名為
人雅重知義理衰衣緩帶逍遙山水間宛然一
老書生也貞祐之亂避於太行保聚失守老幼
皆出降仲升義不受辱投絕澗而死年七十九
孫庭玉字德秀今居山陽

超化

石根寒溜迸珠璣
尋丈驚看雪浪飛
我是玉川烟水客
暫來盤礴亦忘歸

晉祠

小橋流水竹蕭森
竹裏人家一徑深
只欠東風小籬落
梅花疎淡月籠陰

御訂全金詩增補中州集卷四十

欽定四庫全書

御訂全金詩增補中州集卷四十一

王敏夫 二首

敏夫五臺人作詩工於賦物甚為趙宜之所稱
鴈門前輩中有許蛻子遷以武皇廟詩著名又
酒渴後四句云眼底恨無雲夢澤胸中疑有沃
焦山南窓花影三竿日指點銀瓶照病顏有集
傳河東往往稱此倪民望字具瞻屏山所謂倪

侯頭如筆其鋒不可當者有種松詩云種松莫
種柳種柳莫種松堅脆非所計雅俗寧與同可
是種松無隙地却教憔悴柳陰中張韶九成寄
朔州苟輔臣云陳雷膠漆輕餘子楚漢風雲屬
少年李忠直卿賦雪云不將柳絮春風比好作
梨花夜月看至於蘇吉莘老李鵬翼冲霄與具
瞻之子仲儀詩文多可傳喪亂之後惜不能記
憶之矣

同東巖元先生論詩

林逋仙去幾多年驚見梅花第二篇
千歲冰霜松骨瘦
九秋風露鶴聲圓
騰輝定出連城上
得趣知從太古前
邂逅茅齋話終夕
只疑人世改桑田

李氏友雲樓

霧幕烟迷十二欄
壺觴招我一躋攀
黃簾卷起湘川竹
分得西州數點山

王利賓 一首

利賓字茂實襄城人朴直純素作詩有古意似其為人然亦未嘗以示人也家與衛昌叔隣居而不相往來計平生所友惟不肖而已予一日過襄城知茂實病就臥內候之乃見壁間所黏五言古詩十數首竄改重疊往往可傳然後知茂實所以交予者特以詩故耳渠既不言予亦無從知之惜登時不謄寫今忘之矣

題扇頭

輕紗畫竹雀柄短不盈握暑氣正憑陵清風一何邈

孫益 一首

益字德裕秀容人嘗從先大夫學詩

送張安中還雲中

名保極雲朔名士

相送還相送臨分手重分驂
騶欣得路鴻鴈惜離羣
木落黃華路城低紫塞雲
中秋月正好千里漫思君

張獻 一首

獻字君玉大名朝城人嗜作詩年已老而刻苦

殊未減為人謹愿有禮見稱諸公間卒年六十
八子鏞鎮今居鄉里

送侯道士

十年走南北黃塵汗人衣翩翩夜啼鳥一枝無可依問
君何所如鳬鳥東南飛恨我不得往失脚甯與機從君
知不能一笑人間非何水無蒲魚何山無蕨薇終當拂
衣去往叩雲山扉

徐好問一首

好問字裕之永寧人

龍門

疏鑿而來道路通行人萬古翠微中南山山寺題詩滿
一字何嘗到禹功

呂大鵬一首

大鵬字鵬舉密縣人自言宋名相申公之裔宣
宗頻歲南伐鵬舉作詩欲以撼主兵者云逢掖
無由挂鐵衣劍花生澀馬空肥燈前草就平南

策一夜江神涕泣歸其以氣岸自許皆此類也

夏日

北渡
後作

旋移石枕拂藤牀細灑槐陰趁晚涼大地噉噉困爐鼎
老天不肯下殘陽

高永一首

永字信卿出於盤陽大族父元字善長教信卿
作舉子讀書畧通即棄之去為人不顧細謹有
幽并豪俠之風賓客入門則盡家所有者為具

不為明日計人以此愛之貞祐初避兵太原與
李長源居於廣平寺有盜穴墻而入長源性惟
怯聞騷罕聲喋不敢語盜盡挈信卿所有而去
長源徐曰綠林之子至矣於是信卿生理大狼
狽南渡居嵩州出入屏山之門其學遂進初名
夔字舜卿又名揆屏山改焉真定王之奇士衡
攻雜學屏山目為怪魁王從之內翰為賦善哭
詩奉聖馬餌升公敢為大言著書十萬言號北

新子大畧以談兵為主且曰古人兵法非不盡
但未有北新子五十里火雨耳信卿皆與之游
故其詩豪宕譎怪不為法度所窘有冰柱雪車
風調觀咀龍篇及大雨後見寄可槩見矣正大
壬辰病歿於京師年四十六

補歸潛志高永信卿漁陽人倜儻尚氣輕財好
交游頗讀書喜談兵文辭豪放長於論事嘗從
屏山遊與李長源元裕之杜仲梁李稚川相善

屢舉不第家甚貧正大末余居淮陽信卿持諸
公書來謁因為定交留月餘西去未幾同在南
京被圍嘗上書言事不報以病死自號應庵

跋賈天升所藏段志寧山水

蒼壁雲氣湧長松風雨寒湍流劈山出玉虹飲溪灣胸
中無雲夢筆底無江山想見破墨初布袖蛟龍蟠壯觀
駭魂魄萬象本自閒寒齋靜相對遠意空追攀

孫邦傑一首

邦傑字伯英雄州容城人曾祖堅國初有功官至隴州刺史伯英少日住太學有時名所與游皆名士興定初知世將亂棄家為黃冠師

附元好問孫伯英墓銘伯英在太學時所與遊皆一時名士故相程公日新判河南伯英居門下甚愛重之貞祐初中原受兵朝廷隔絕府治中高廷玉獻臣接納奇士號為衣冠龍門大尹復興基之會有為飛語者云治中結客將據河

以反遂為尹所構凡所與往來者如雷淵希顏
王之竒士衡辛愿敬之俱陷大獄危有一網之
禍伯英出入府寺人為出死力者多故得先事
遁去會赦乃歸貞祐丙子予自太原南渡故人
劉昂霄景玄愛伯英介予與之交因得過其家
登壽樂堂飲酒賦詩樽俎間談笑有味使人久
而不厭伯英時年四十許困名場已久重為世
故之所挫折稍取莊周列禦寇之書讀之視世

味益漠然矣予意其本出將家氣甚高已折節
為書生束以詩禮優柔饜飫偶以蘊藉見名其
鬱鬱不能平者時一發見如縛虎之急一怒故
在世已亂天下事無可為思得毀裂冠冕投竄
山海以高蹇自便日暮途遠倒行而逆施之古
人或為抱關或仕執翻或亡從博徒賣漿者遊
其畫皆出於無聊賴之至耳非本志也又明年
客有來崧山者云伯英真為黃冠師矣正大庚

寅十月十九日歿於亳之太清宮春秋五十有
一因即其地葬之始祖堅國初以軍功贈龍虎
衛上將軍隴州刺史祖楫武畧將軍魯山令父
鈞武義將軍昌州鹽使司判官室劉氏前歿子
璋堦同郡王好禮伯英初名邦傑後改天和孫
氏雄州容城人居雒陽四世矣銘曰馬逸馮駕
犢健破車霸畧所貪世議之拘我足天衢彼責
守閭我材明堂彼求侏儒蚩蚩之與曹而昧昧

之與居俱腐草木孰別以區千百載而下或有
攘蓬而問者又焉知其輕世肆志自放於方之
外以耗壯心而老歲月歟

燒筍

煨拙舊聞山谷語勸畊還憶大蘇詩傳將火候無多訣
留得天真又一奇未放錦裯開束縛已看玉版證茶毘
白麻初拜驚燒尾見此應慙富貴癡

曹用之 一首

用之歸德人幼有賦聲屢中甲乙詩亦有功嘗
戲作鬼仙語云瀏瀏竹間雨熒熒窓下燈相逢
不相顧含淚過巴陵詩有本事中山楊正卿能
道所以然真人作鬼語也

憶舊

花鳥巡簷喚曉晴喚來和氣滿春城春風二十年前客
煮酒青梅也後生

趙達夫 二首

達夫太原人性嗜讀書而不事科舉南渡後居
緱氏山中安貧守分故終世窮悴壬辰之兵遇
害

紅梅

西湖句好已成塵蠟點都能幾許春乞與瓊兒薄梳洗
才情留待月中人

柳

楊柳攬春不耐秋十分憔悴儘風流水邊沙際風烟冷

收拾殘陽付暮愁

邢安國 二首

安國字仲祥沁州武鄉人少日有賦聲四十歲
後即不應科舉以詩酒自娛避亂客泌陽十餘
年後北歸備極艱苦其見於詩者如此往時李
長源傳仲祥柳花一詩渠甚愛之今以丹崖集
校之與傳者不同當是長源曾與商畧之耶

楊花

細點輕團轉復飄隋家堤岸壩陵橋非綿非絮寒無用
如雪如霜暖不消狂惹客衣知有恨巧尋禪榻故相撩
陂塘回首浮萍滿依舊春風擺翠條

過唐州西李口

白沙翠竹溪上村漁家賣魚喚行人西風吹皺一溪水
水光日影金鱗鱗

張溫一首

溫字元佐上黨人祖仲容字才翁宋末登科仕

至屯田員外郎以好士名天下致仕後有詩云
病身衰退謝明朝北洞閒眠晝寂寥十畝晚禾
烟冉冉一林修竹雨瀟瀟黑花遮眼秋不落白
雪撲頭春未消世事悠悠吾老矣一壺濁酒且
逍遙至今為鄉里所傳元佐泰和六年李演榜
乙科登第詩樂府俱有名於時

感懷一首

彌月不出門出門沙漲東風昏老樹擺撼轟雷奔鬼物

叫嘯山前村僑居客子驚心魂歸來繞屋尋蘭蓀蘭蓀
落索靈苗髡主人醉倒老瓦盆衣袖半帶淋漓痕芸芸
蕭艾同歸根天生天殺何怨恩糟牀與翁共清渾絕勝
被髮叫帝閭

馬舜卿一首

舜卿名肩龍以字行宛平人先世遼大族有知
興中府者故又號興中馬氏祖大中國初登科
節度全錦兩州父成誼字宜之張楫榜登科京

兆路統軍司判官舜卿在太學有賦聲宣宗初
人有告宗室從坦殺人從坦字履道一時賢將
帥處猜嫌之地人以為必死而不敢言其冤舜
卿以太學生上書大畧謂從坦有將帥材方今
人物無有出其右者臣一介書生無用於世願
代從坦死留為天子將兵書奏詔問汝與從坦
交分厚耶舜卿對臣知有從坦從坦未嘗識臣
從坦寃人不敢言臣以死保之宣宗感悟赦從

坦授舜卿東平錄事委行臺試驗宰相侯莘公
與之語不契留數月罷歸將渡河與排岸官紛
競筐中搜得軍馬糧料名數及利害事目疑其
姦人之偵伺者繫歸德獄根勘適從坦至立命
出之正大四年冬薄遊鳳翔德順州將愛申以
書招舜卿舜卿欲往鳳翔總管以敵兵勢甚張
吾城可恃德順不可守勸勿往舜卿曰愛申平
生未嘗識我一見為知己我知德順不可守我

往必死然以知己故不得不死也乃舉行索付
族父明之為死別冒險而去既至不數日受圍
城中義兵七八千而已州將假舜卿鳳翔總管
判官守禦一以委之凡受攻百日食盡乃陷軍
中募生致之不知所終時年五十三詔贈某官
配食褒中廟舜卿年少時過襄垣題詩酒家壁
辭氣縱橫時輩少有及者如云玉鞭再過長安
道人面依前似花好殷勤勸我梨花春要看
罇

前玉山倒他語類此

會州道中

山腰薄雪眩朝曦未放陽和入燒痕一片長安世情月
梨花院落幾黃昏

御訂全金詩增補中州集卷四十一

欽定四庫全書

御訂全金詩增補中州集卷四十二

郝天挺一首 補五首

天挺字晉卿陵川人家世儒素伯父子颺有詩
名號東軒老人先生少日有賦聲早衰多疾厭
於名場遂不復就舉負祐之兵避於河南往來
淇衛間為人有崖岸耿耿自信寧落薄而死終
不一傍富兒之門年五十七卒於舞陽臨終浩

歌自得不以死生為意其平日自處為可見矣
好問十四五先人令陵川時從先生學舉業先
生教之曰今人賦學以速售為功六經百氏分
磔綴緝外或篇題句讀之不知幸而得之不免
為庸人況一敗塗地者乎又曰讀書不為藝文
選官不為利養唯通人能之又曰今世仕宦多
用貪墨敗官皆苦於飢凍不能自堅者耳男子
生世不耐飢寒則雖小事不能成子試以吾言

求之先生工於詩時命好問屬和或言令之子
欲就科舉詩非所急將無徒費日力耶先生曰
君自不知所以教之作詩正欲渠不為舉子耳
子思溫字和之孫經字伯常今居順天

附元好問郝先生墓銘泰和初先人調官中都
某甫成童學舉業先人思所以引而致之者謀
諸親舊間皆曰濩澤風土完厚人質直而尚義
在宋有國時俊造輩出見於黃魯直季父廉行

縣之詩風俗既成益久益盛迄今帶經而鉏者
四野相望雖閭巷細民亦能道古今曉文理為
子求師莫此州為宜於是先人乃就陵川令之
選時鄉先生郝君方聚子弟秀民教授縣庠先
生習於禮義之俗出於賢父兄教養之舊且嘗
以太學生游公卿間閱人既多慮事亦審故其
容止可觀而話言皆可傳州里老成宿德多自
以為不及也某既從之學先生嘗教之曰學者

貴其有受學之器器者何慈與孝也今汝有志
矣器如之何又曰今人學詞賦以速售為功六
經百氏分裂補綴外或篇題句讀之不知幸而
得之且不免為庸人況一敗塗地者乎先人既
罷官某留事先生又二年然後歸先生歿於成
臯其子思溫歸葬鄉里以書抵某言吾子往年
赴弔成臯曾以墓銘為請今卒事矣願有以慰
不肖孤之心某謝不敢當六七年之間思溫之

請益堅辛丑之秋又屬其外兄牛元偉來致辭
曰先子生無一命之爵歿無十金之產賁志下
泉有識興嘆授業得如吾子者且不能一言半
辭以見於後世其命也矣某再拜曰僕有罪乃
叙而銘之先生諱天挺字晉卿先世有自太原
遷上黨者宋末又遷陵川遂為陵川人曾祖諱
元祖諱璋考諱昇以選擇為縣功曹至先生之
伯父東軒先生始宦學蔚為聞人先生少日舉

進士預春官氏薦書便能出諸公之右多疾早
衰厭於名場遂不就選以某年月日遘疾春秋
五十有七終於寓舍前娶同縣張氏繼室高平
司氏子男一人即思溫也女一人嫁進士侯公
佐男孫三人曰經曰恒曰彛經最知名女孫一
人弟天禔從弟天祐猶子思忠皆有聲場屋間
銘曰篤於其資誠於其思行可以士矩政可以
吏師奉璋戕戕其誰曰我私畀鉉基而奪之時

操利器而莫施窮巷抱書涅而不緇曳履商謳
長與世辭寧以一寒暑往來之蹙槩細人而怨
咨良璞含光平價不貲棄擲泥塗識者涕泗孰
物之尸孰命之司吾欲問之有如先生者而至
於斯有如先生者而止於斯

送門生赴省闈

青出於藍青愈青小年場屋便馳聲未饒徐淑早求舉
却笑陸機遲得名嗟我再衰空緝繹喜君初筮已崢嶸

此行占取黿頭穩平地烟霄屬後生

題麻姑壇

路入雲關仙境佳瓊田瑤草帶烟霞貯經洞古無遺檢
養藥爐存失舊砂青鳥不傳金母信紫鸞應返玉皇家
巖扉不掩春長在開盡碧桃千樹花

蓮花菊

十丈花開玉井遙翻成叢菊老秋標寒枝白日塵無點
凍蘂經霜瓣不凋依徑香生妃子步遶籬嫩比六郎嬌

雙歌一曲淵明醉辜負扁舟冷畫橋

遊石壁有呈二首

廊廟雍容四十秋旱為霖雨濟為舟五朝寵遇已黃髮
六詔歸來方黑頭後部風雷詩鼓吹前途山水酒觥籌
試看絕壁秋雲句知是承平宰相遊

絕壁秋容勝荒壇冷氣清野僧留客飲山鳥背人鳴已
極登臨興無窮今古情浩歌一樽酒四海共昇平

題宣聖廟

金碧煌煌梵剎雄玄元樓觀五雲中如何萬代綱常祖
釋奠今無數畝宮

附青鞋踏雪志汾州學宮門右有石嵌壁中乃
金郝天挺募建文廟疏其文伏以下書絕句一
首即接謹疏字

附陵川文集郝天祐字賢卿陵川人貞祐初隱
居魯山作古文歌詩尤玩意書法嘗以為正書
當以篆隸意為本而鍾王書之經也顏坡書之

傳也其餘則諸子百家耳故其筆勢莊重秀勁
能作丈餘楷草嘗言大字雖大而小小字雖小
而大正書須有草意草書須有正筆其論書如
此

附李詡戒菴老人漫筆唐詩鼓吹舊云郝天挺
注金又有一郝天挺兩山墨談亦考之不審

溪南詩老辛愿

二十首

愿字敬之福昌人其大父自鳳翔來居縣西南

女几山下以力田為業敬之自號女儿野人年
二十五始知讀書取白氏諷諫集自試一日便
能背誦乃聚書環堵中讀之書至伊訓詩至河
廣頗若有所省欲罷不能因更致力焉音義有
不通者搜訪百至必通而後已有一事闕十年
者由是博極羣書於三傳為尤精至於內典亦
稱該洽杜詩韓筆未嘗一日去其手作文有綱
目不亂詩律深嚴而有自得之趣性野逸不脩

威儀貴人延客敬之麻衣草履足脛赤露坦然
於其間劇談豪飲旁若無人高獻臣為河南治
中聞其名引為上客及獻臣為府尹所誣敬之
亦被訊掠幾被一網之禍自是以敬之之名
為諱絕不與友不二三年生事大狼狽田五六
十畝歲入不足一牛屢為追胥所奪竟賣之以
為食衆雛噉噉張口待哺稚負高氣不能從俗
俯仰迫以飢凍又不得不與世接其枯槁憔悴

流離頓踣往往見之於詩元光初予與李欽叔
在孟津敬之自女儿來為之留數日其行也欽
叔為設饌備極豐腆敬之放箸而歎曰平生飽
食有數每見吾二弟必得美食明日道路中又
當與老飢相抗去矣會有一日辛老子僵臥柳
泉韓城之間以天地為棺槨日月為含襚狐狸
亦可螻蟻亦可耳予二人為之惻然敬之佳句
極多如自憐心似魯連子人道面如裴晉公萬

事直須稱好好百年端欲付休休院靜寬留月

窓虛細度雲浪翻魚出浦花動鳥移枝之類恨

不能悉記耳

木樓云吟窓醉几秋風晚只許幽人箇裏知三鄉光武廟云方山青

遠一川斜到其處知為工也

予嘗論敬之士之有所立必藉

國家教養父兄淵源師友講習三者備而後可

喻如世之美婦多出於膏腴甲族薰醲含浸之

下閭閻間非無名色一旦作公夫人則舉步羞

澀曾大家婢不如其理然也故作新人材言教

育也獨學無友言講習也生長見聞言父兄也
至於傳記所載西子乃苧蘿山采薪氏之女越
君臣教之容止七日而納之王遂能惑夫差傾
吳國豈常理也哉敬之落落自拔耿耿自信百
窮而不憫百辱而不沮任道致遠若將死而後
已者三十年亦可謂難矣南渡以來詩學為盛
後生輩一弄筆墨岸然以風雅自名高自標置
轉相販賣少遭指擿終死為敵一時主文盟者

又皆汎愛多可坐受愚弄不為裁抑且以激昂
張大之語從臾之至比為曹劉沈謝者肩摩而
踵接李杜而下不論也敬之業專而心通敢以
是非白黑自任每讀劉趙雷李張杜王麻諸人
之詩必為之探源委發凡例解絡脉審音節辨
清濁權輕重片善不掩微類必指如老吏斷獄
文峻網密絲毫不相貸如衲僧得正法眼徵詰
開示幾於截斷衆流人有難之者則曰我雖不

解書曉書莫如我故始則人怒之罵之中而疑之已而信服之至論朋輩中有公鑒而無姑息者必以敬之為稱首蓋不本於教育不階於講習不出於父兄而卓然成就如此然則若吾敬之者真特立之士哉

劉景玄趙宜之雷希顏李欽叔張仲經杜仲梁王仲

澤麻
知幾

補歸潛志辛愿敬之河南人自號女儿野人又號溪南詩老幼嗜書苦學坐環堵數年由是六

經百家無不通貫喜作詩五言尤工人以為得
少陵句法平生不為科舉計且未嘗至京師若
然中州一逸士也為人質若不閑世事麻條草
履或倚杖讀書市中人訝之亦不卹嘗謂王鬱
飛伯曰王侯將相世所共嗜者聖人有以得之
亦不避得之不以道與夫居之不能行己之志
是欲澡其身而伏於厠也此言他人難聞子宜
保之此可見其志趣也貞祐初先子主長葛簿

敬之素不識聞名來謁相得甚懽及別厚贈之
歸而買牛使其子躬耕以自給居女儿山下往
來長水永寧間惟以吟詠講誦為事朝士大夫
願交而不得也正大中先子令葉復來游後歸
洛下病歿有詩數千首藏在竹橐中其佳句有
云院靜寬留月窓虛細度雲又鶯銜晚色啼深
樹燕掠春陰入短牆又波搖朗月浮金鏡嶺隔
華星斷玉繩又箕山潁水春風裏喚起巢由共

一杯又黃綺暫來為漢友巢由終不是唐臣真處士詩也

附元好問楊叔能小亨集引貞祐南渡後詩學
大行初亦未知適從溪南辛敬之淄川楊叔能
以唐人為指歸敬之舊有聲河南叔能則未有
知之者興定末叔能與予會於京師遂見禮部
間間公及楊吏部之美二公見其幽懷久不寫
及甘羅廟詩嘖嘖稱嘆以為今世少見其比及

將往關中張左相信甫李右司之純馮內翰子
駿皆以長詩贈別間間作引謂其詩學退之此
日足可惜頗能似之至比之金膏水碧物外自
然奇寶景星丹鳳承平不時見之嘉瑞叔能用
是名重天下今三十年然其客於楚於漢汚於
燕趙魏齊魯之間行天下四方多矣而其窮亦
極矣叔能天資澹泊寡於言笑儉素自守詩文
似其為人其窮雖極其以詩為業者不變也其

以唐人為指歸者亦不變也今年其所誤小亨
集成其子復見予鎮州以集引為請予亦愛唐
詩者唯愛之篤而求之深故似有所得嘗試妄
論之詩與文特言語之別稱耳有所記述之謂
文吟咏情性之謂詩其為言語則一也唐詩所
以絕出於三百篇之後者知本焉爾矣何謂本
誠是也古聖賢道德言語布在方冊者多矣且
以弗慮胡獲弗為胡成無有作好無有作惡攷

雖小天下莫敢臣較之與祈年孔夙方社不莫
敬共明神宜無悔怒何異但篇題句讀不同而
已故由心而誠由誠而言由言而詩也三者相
為一情動於中而形於言言發乎邇而見乎遠
同聲相應同氣相求雖小夫賤婦孤臣孽子之
感諷皆可以厚人倫美教化無他道也故曰不
誠無物夫不誠故言無所主心口別為二物物
我邈其千里漠然而往悠然而來人之聽之若

春風之過馬耳其欲動天地感神鬼難矣其是
之謂本唐人之詩其知本乎何溫柔敦厚藹然
仁義之言之多也幽憂憔悴寒飢困憊一寓於
詩而其阮窮而不憫遺佚而不怨者故在也至
於傷讒疾惡不平之氣不能自揜責之愈深其
旨愈婉怨之愈深其辭愈緩優柔饜飫使人涵
泳於先王之澤情性之外不知有文字幸矣學
者之得唐人為指歸也初予學詩以十數條自

警云無怨懟無謔浪無驚狠無崖異無狡獪無
嬋阿無傳會無寵絡無銜鬻無矯飾無為堅白
辨無為聖賢癩無為妾婦妬無為仇敵謗傷無
為聾俗閨傳無為瞽師皮相無為黥卒醉橫無
為黥兒白捻無為田舍翁木強無為法家醜詆
無為牙郎轉販無為市倡怨恩無為琵琶娘銷
魂韻詞無為村夫子兔園策無為算沙僧困義
學無為稠梗治條詞無為天地一我今古一我

無為薄惡所移無為正人端士所不道信斯言也予詩其庶幾乎惟守之不固竟為有志者之所先今日讀所謂小亨集者祇以增媿汗耳予既以如上語為集引又申之以種松之詩因為復言歸而語乃翁吾老矣自為瓠壺之日久矣非夫子亦何以發予之狂言己酉秋八月初吉河東元某序

亂後

兵去人歸日花開雪霽天川原荒宿草墟落動新煙困
鼠鳴虛壁飢烏啄廢田似聞人語亂縣吏已催錢

贈趙仲常

名憲宜之從弟詩有黃塵衮衮
時隨腳華髮蕭蕭老壓頭之句

趙子年雖小論詩樂最深秋風凡幾首冬日更多吟老
大吾無力文章爾用心荒山松竹底莫厭數相尋

過崧山

催老年光衮衮來好懷知欲向誰開箕山潁水春風裏
呼起巢由共一杯

隆德故宮

蛇分鹿死已無秦
五十年來漢苑春
問著流鶯無一語
柳條依舊拂牆新

同趙長水汎舟

洛水秦山晚自澄
孤洲煙樹綠相仍
波搖朗月浮金鏡
嶺隔華星斷玉繩
但覺轉船驚白鳥
豈煩揮袂怒青蠅
風塵浩蕩飄蓬裏
愧似林宗陪李膺

山寒

山寒春靜早關門
新月微光照短垣
可恨暮雲欺落景
却將殘靄助黃昏

陋室

陋室何妨似燕窠
暮年終得返魚蓑
壺中日月時常好
枕上功名不足多
往古來今真夜旦
高天厚地一宜羅
鹿門幸有龐公樂
牛角徒為甯戚歌

亂後還三首

兵戈為客苦思鄉
春暮還鄉却自傷
典籍散亡山閣冷

松筠憔悴野園荒
鶯銜晚色啼深樹
燕掠春陰入短牆
鄰里也知歸自遠
競將言語慰淒涼

亂後還家春事空
樹頭無處覓殘紅
棠梨妥雪霑新雨
楊柳飄綿颺晚風
談笑取官驚小子
艱難為客媿衰翁
殘年得見休兵了
收拾閒身守桂叢

春來漂泊心情減
老去艱危氣力微
芳草際天愁思遠
干戈滿地故人稀
懷金躍馬時何有
問舍求田事已違
攜食敝衣聊自足
白頭甘息漢陰機

題游彥明林園三首

先生未老厭儒冠
築屋栽籬守歲寒
經史日長常滿案
魚鰕溪近得供盤
幽花入室無多種
瘦竹關情只數竿
瀟灑遠辭車馬跡
求官何必近長安

城郭繁華斷往還
林園幽閒養高閒
花低暖藥斜窺水
竹亞晴梢巧避山
罇俎歲時君得意
風埃南北我何顏
丹房藥竈游心久
不惜哀矜洗病孱

不礙遙看冷翠微
儘教叢竹映窓扉
籬根傍水魚知樂

屋角隣花鳥自歸濁酒野芹安已久華軒高馬到從稀
人間回首皆堪鄙羨汝幽棲得所依

贈劉菴主

劉遼
貴族

蚤薄軒裳貴高尋綺皓蹤一囊閭里藥六尺水雲筇午
枕眠芳景晴簷望遠峰柴門常不掩應得野夫從

函關

雙峰高聳大河旁自古函關一戰場紫氣久無傳道叟
黃塵那有棄繻郎煙迷短草秋還綠露浥寒花晚更香

共說河山雄百二不堪屈指算興亡

贈趙宜之二首

夫子今詞伯胡為遠帝京青雲無轍迹白髮有柴荆鬼
戲多年病人高四海名麟經方有缺無惜繼立明

轉徙家無地逢迎客有樽光陰連病枕天地一愚軒霜
雪青松古風塵白壁溫從渠投隙者衮衮向金門

送裕之往許州酒間有請予歌渭城朝雨者因及
之

白酒留分袂青燈約對牀言詩真漫許知己重難忘爽
氣虛韓獄文星照許昌休歌渭城柳衰老易悲傷


寄裕之

青雲一別阮家郎甚欲題詩遠寄將好句眼前常蹉過
佳人心上不曾忘誰家秋月茅亭底何處春風錦瑟旁
昌谷煙霞久寂寞歡遊還肯到三鄉

山園

歲暮山園懶再行蘭衰菊悴頗關情青青多少無名草

爭向殘陽暖處生



御訂全金詩增補中州集卷四十二